

162 Kilo di cocaina tabata di transito na Aruba


Te ainda 11 Colombiano y 2 Arubiano deteni

ORANJESTAD(AAN) - Gracias na e miembro di Douane Recherche, cu awor autoridad a tira man ariba e 162 kilo di cocaina cu tabata deposita den un cas na Playa.

Manera ya DIARIO a publica, e miembro di Douane Recherche a mira e 4 Colombianonan, kendenan den promer instante tabata worde sospecha pa contrabando, y a notifica autoridad. Despues a resulta cu e tiponan aki a caba di baha e lote di cocaina na Surfside y esaki a worde deposita den un cas na Playa.

Durante interrogacion e miembronan di Departamento di Narcotica S.V.M. no por a saca mucho cos pero no a dura mucho cu e Colombianonan a cuminsa canta mescos cu trupial y esaki a conduci na detencion di 9 persona mas y captura di e lote di cocaina cu por worde mira ariba e foto.

Ayer durante un conferencia di prensa, dos miembro di Departamento di Narcotica, Sambo y Zaandam, a relata con leu e investigacionnan ta. Segun



Desde cu a desvela e estatua di Simon Bolivar, por nota cu ora awacero cay cement ta los y sali for di e intarmer. Informacion cu DIARIO a ricibi, e intencion ta pa kita e estatua y drecha e fundeshi pa evita cu esaki por sac den otro.

Sambo, mas o menos 3 siman pasa nan a ricibi informacion cu un contrabando pisa di droga lo tuma lugar na Aruba.

S.V.M. no a perde pa gana y a haci e controlnan na nos costanan mas severo.

Ta asina cu ora a detene e 4 Colombianonan, ya e droga a worde hinca den auto y hiba na e cas caminda nan a worde haya. A pesar di esaki, e miembronan di S.V.M., den un forma unico y profesional, a sa di localisa e droga.

Investigacion a indica

cu e boto chikito cu a worde confisca, tabata worde usa pa trece e droga cu tabata ariba un barco tera.

En total 13 persona ta encarcela relaciona cu e caso aki. Entre e 13 personanan, 2 ta Arubiano y 11 ta Colombiano.

Zaandam a duna di conoce na DIARIO cu en realidad ta trata aki di 162 paki. Ariba e foto por mira 160. Esaki ta e lote cu a worde haya na un cas pero anteriormente a haya dos paki na cas di un Colombiano kende a worde deteni.

E droga aki ariba mercado tin un balor di mas o menos 30 pa 40 Millon Dollar.

Tanto Zaandam como Sambo ta di opinion cu e cantidad di droga aki ta demasiado pa Aruba y ta kere mas bien cu e droga ta destina pa exterior.

Esaki ta indica cu Aruba ta worde usa como trampolin pa traficantenan di droga. Sambo a enfatisa cu ainda e investigacion ta curu y pesey no por duna nomber ainda.

No por exclui e posibilidad cu pronto lo cay mas detencion.